

【無共樣个粽仔】黃美貞原作

粽仔在臺灣係當平常个點心，閒時間節想食粽仔就買得著。毋過，五月節該下，大家一定會特別緝粽仔，無就去店頭買欸兩環粽仔過願①合過節。

自係知人我，屋下个粽仔就係自家緝个，阿姆講：「細妹嫁人做心白，打板緝粽愛學擘。」苟薑葉②係客家人好用个粽葉，緝鹹粽前半隻月，就愛去山項、河壩脣，擇較賁較大皮个葉仔，為著粽葉走去山項兩三轉，係極平常个事情。風吹雨涿个苟薑葉，異多塵灰會黏在葉仔項，愛用老菜瓜布定定仔搓，搓淨正好放在大鑊焯，焯分佢軟又出味，講實在話，單淨準備粽葉就無恁該哦！

阿爸長透講：「鹹粽个米盡要緊，毋驚粒就驚綿。」阿姆一直堅持米愛用鑊頭定定仔焯，雖然背尾有電鑊仔做得蒸米，乜毋當阿哥一句：「用炒个米較好食！」香料毋使多就愛焯③來香，轉色个蘿蔔乾、簡單个豆腐乾、三層腩个烏豬肉，還有細蕊个鈕仔菇，害佢官起勢緝，就試著肚當飢。阿姆打早疏床，無閒泊杈④到半下晝，緝好粽仔堵好赴食夜，連第二日个便當就係清香个苟薑粽。

背尾去南部讀書，共宿舍个同學知佢無轉屋過節，總係會

帶加幾隻仔粽仔分佢食，佢講：「南部粽係包生米去焯，愛焯畀酪酪，中央个三層肉，一入嘴就會化忒。」還有同學請佢食「菜粽」，裡肚無包菜，顛倒係異多番豆，搵特製个甜醬，緊噉就緊香。無論北部粽、南部粽還係菜粽，佢都準飯食，過一個五月節，輒常食忒十過隻粽仔，該載⑤胃腸消化好，毋識有飽脹个症頭，大家說佢有食祿⑥。

記得有一年个五月節，佢在外國讀書，同鄉湊等去華人超市買粽葉、糴糯米，共下過節打鬥敘，每一儕都認真去想阿姆緝个粽仔，有麼个好料仔，有人講：「鹹卵黃！」有人講：「魷魚仔！」大家你一句，佢一句，歸日仔話無停，講自家屋下个粽仔一等好食，結果香料放到淊淊淊，刻耐仔用粽葉包起來又緝毋核，將就解開來。粽葉攤在鑊底，糯飯同香料放在粽葉項，包尾用粽葉舂等，蒸成十分鐘仔，無想著這隻大鑊粽恁錫人，好食到連舌嫲就會吞落去。

嫁來臺北十過年，食過个粽仔既經毋知有幾多，一直到今，佢還係試著苟薑粽盡好食，該種特殊个香氣，就係阿姆个味緒，食過就會尋尾⑦，係一種放在心肝肚个感動。

⑤該載：音 goi' zai；幸虧、還好。

⑥有食祿：音 iu' siid lug'；有享用美味食物的福氣。

⑦尋尾：音 qim' mi'；意猶未盡。

①過願：音 go ngien；過癮。 ②苟薑葉：音 gieu' giong' iab；月桃葉。

③焯：音 biag；乾煎。 ④無閒泊杈：音 mo' han' qi ca；非常忙碌的樣子。